

李文忠公奏稿

李文忠公奏稿

卷之四十三目錄

請派巴西換約大臣摺

光緒八年正月十四日

清理東淀摺

光緒八年正月二十日

滹沱入子牙辦法摺

光緒八年正月二十日

籌辦東淀河道摺

光緒八年正月二十日

各軍承辦永定南運河工片

光緒八年正月二十日

李朝儀捐建專祠片

光緒八年正月二十日

東海關緩解京餉片

光緒八年正月二十日

遵撥塔城礮彈摺

光緒八年正月二十五日

查覆盛慶兩軍摺

光緒八年正月二十五日

量減旗租經徵處分摺

光緒八年二月初四日

三廳荒地查辦完竣摺

光緒八年二月初四日

請假省母摺

光緒八年二月三十日

覆陳駕駛兵船回華獎案片

光緒八年三月初三日

承屬官鹽督銷摺

光緒八年三月初三日

籌辦朝美議約摺

光緒八年三月初六日

創設廣仁堂摺

光緒八年三月初六日

查明買併旗昌花紅摺

光緒八年三月初六日

覆查盛宣懷片

光緒八年三月初六日

試辦織布局摺

光緒八年三月初六日

查覆津關常稅摺

光緒八年三月初六日

馳報丁憂摺

光緒八年三月初七日

謝賜祭摺

光緒八年三月十一日

懇請終制摺

光緒八年三月十一日

再懇終制摺

光緒八年三月二十一日

李文忠公奏稿卷四十三

全集一之四十三

桐城吳汝綸編錄

請派巴西換約大臣摺

光緒八年正月十四日

奏爲請

旨欽派大臣與巴西國互換條約恭摺仰祈

聖鑒事竊查巴西國前派使臣喀拉多穆達等來華議約於光緒六年六月內奏奉

諭旨派臣爲全權大臣與該使臣等會議商訂嗣因原訂約款內有應行商改之處復於光緒七年八月內經臣遵

旨與喀拉多穆達兩國和好通商條約會議增改畫押蓋印並於約內第十七款載明俟兩國

御筆批准或在上海或在天津彼此卽行互換疊經專摺奏明在

案茲准巴西國使臣喀拉多照會兩國條約今奉本國外部電咨業經批准擬度本國約本不日可到照請訂明互換條約宜在何處等情前來臣溯查同治年間丹荷比義奧各國先後遣使來華均蒙

欽派全權大臣在天津與之議約嗣奉

御筆批准後有在上海互換者隨時請

旨遵辦茲查喀拉多現在上海應否

特派大員即在上海與之互換抑應飭令來津恭候

欽派大臣互換之處臣未敢擅擬相應據情請

旨伏候

命下卽由臣照覆該使臣欽遵辦理並由總理各國事務衙門照案將條約原本發交換約之員祇領遵辦除照錄巴西使臣照會

恭呈

御覽外所有擬請

派員互換條約緣由理合恭摺由驛具陳伏乞

皇太后

皇上聖鑒訓示謹

奏

清理東淀摺

光緒八年正月二十日

奏爲東淀水道多被民間侵種亟須設法清理恭摺仰祈

聖鑒事竊臣欽奉光緒七年十一月十二日

寄諭有人奏直隸卸署文安縣知縣陳紹謚在署任時妄議加增稅銀藉端勒捐因案納賄諱盜爲竊各等語著李鴻章董華游百川按照所參各款秉公查明據實參辦等因欽此除原奏陳紹謚藉端勒捐因案納賄諱盜爲竊各款或有案可稽或須提訊人證俟臣等詳細查明另行據實奏辦外其所參加增稅銀一款係指現議清查東淀地畝而言查東淀本甚寬廣東西一百四五十里南北六七十里係爲大清等河尾閘蓄洩之區關係至重乾隆三十七年奉

上諭淀泊利在寬深其旁聞有淤地不過水小時偶然涸出水至



仍當讓之於水方足以暢蕩濼而資蓄蓄嗣後毋許復行佔墾遊  
者治罪等因欽此煌煌

聖訓極應永遠遵行乃附近鄉民逐漸侵種百數十年來竟已佔  
去淀地大半現存者不及三分之一臣往來津沽親見叢蘆密葦  
彌望無涯不特難容多水卽淀中舊有河道亦因而淤墊重煩官  
款挑挖該淀既節節壅滯上游各河遂泛濫爲災動關全局及今  
不治再閱數十年將東淀胥爲平陸矣乾隆年間前督臣高斌雖  
有河淀淤地准民墾種之奏然只准墾種無礙水道之地又聲明  
已報升科者應改爲租息分別上等等每畝定爲租銀八分六  
分三分以充河工歲費每戶種地不得過百畝仍嚴禁紳衿胥役  
豪強詭名佔踞今則不論有無關礙水道概行侵種且多係豪強  
佔踞每戶竟至數十頃所呈契串大半假借隱射其糧額則從他

處割裂飛灑並非現種淀地之糧該業戶等既侵佔淀地又飛灑糧額實屬有心朦混本應照例治罪撤地入官惟念愚民不知例禁相沿已久或輾轉們買衣食所資未使一律禁絕不得不變通辦理當於去秋飭派奏調差委道金福曾天津道吳毓蘭督同沿淀霸州文安大城靜海四州縣斟酌查辦令將實係礙水之地仍讓於水其餘飭各業戶將種地若干完糧若干自行據實報出聽候派員勘丈其有糧額者雖不免飛灑情弊暫先就糧核地仍歸原業戶承種其無糧額者亦仍歸原戶並援照前督臣高斌奏案酌改租息以充治河經費旋據金福曾等酌擬章程四條一曰定界址凡有礙水道及現在水深數尺尙有淀形之處應留出以資蓄水永遠不准栽葦墾種其中有完納葦課水泊等糧者查明奏請豁免若稍礙水道而久被淤墾難收回者令於地中多開溝

渠使水至仍可流買一曰設堡船淀中須藉堡船祿夫撈泥挖淺  
凡礙水之蘆葦草隨時芟刈以期日久見功應就所收租息多  
寡以定船數一曰議租息凡不甚礙水道地畝有糧額者就糧核  
地照舊完納無糧者從輕議租上等以每畝三分爲率次則遞減  
惟淀中漲涸無定無庸升科此後若礙水道仍應停種免租讓地  
於水所收租息卽作堡船經費一曰均差徭淀地皆在水濱升科  
尙且不便何況差徭乃州縣苛派書役需索大戶則隱射邀免盡  
累貧民應體察分別裁減均平以昭公允以上各條實係因時制  
宜格外從寬查霸州文安大城靜海舊例羣課自數釐至六分不  
等文安淀地租自三分至八分不等靜海有至一錢六分者乃原  
奏謂舊例自數釐至一分八釐而止並未考查明確現議有糧之  
地照舊完納無糧之地上等每畝租銀三分次則遞減並無將久

經奏定之租額加納八分六分之事且侵種者並未遵照

列聖諭旨撤地治罪亦未限以畝數轉予輕議租息尙得謂爲加

稅聚斂耶此案係臣派員查辦亦非陳紹謚所能妄議前聞各戶

中有刁劣之徒侵種多頃久不完糧因而造謠煽惑希冀把持罔

利是以傳聞失實事關清理東淀水道斷難中止致誤全局臣飭

金福曾等督同印委各員悉心體察持平核辦如有造謠阻撓

及任意隱佔者應查實分別革究並將無糧之地入官庶淀地可

漸疏通水道不致阻滯所有東淀多被侵種設法清理情形理合

會同兼管順天府府尹臣董華順天府府尹臣游百川恭摺獲陳

伏乞

皇太后

皇上聖鑒謹

奏

滹沱入子牙辦法摺

光緒八年正月二十日

奏爲滹沱已復子牙故道應將獻縣新河開寬以資汎漲暢洩並  
修築獻縣以下子牙河兩岸隄工用衛田廬現經籌定辦法恭摺  
仰祈

聖鑒事竊上年十一月欽奉

皇太后懿旨恭親王醇親王奏察看河工情形一摺此外應行修  
濬處所著李鴻章等查勘奏明辦理以興水利而裕民生等因欽  
此遵查滹沱爲直省五大河之一向稱巨浸本由子牙河達津歸  
海自同治七年由築城北徙汎濫橫流經晉州深澤深州安平饒  
陽灌入古羊河下穿獻縣肅甯河閒任邱雄縣保定霸州大城境  
內而歸文安大窪其藪城南入子牙河故道屢次勘查沙淤極深  
不能挽復而現行古羊河下游並無出路沿河州縣受害甚廣文

安一帶久成澤國臣幾經設法籌度須於劇縣朱家口古羊河東岸月關減河使其分歸子牙前派道員史克寬詳細察勘妥議卽於去春開工自朱家口起至子牙河止計長三十三里零平地挑挖口寬十一丈至十五丈底寬五丈至十二丈高處挖深一丈九尺最窪處挖深七尺於兩岸五六丈外出土堆築南北新隄底寬五六丈頂寬二丈二三尺高一丈三四尺地形極順深得吸川之勢夏閒工竣開闢大溜東趨竟將原走古羊河之滹水全行奪入新河復歸子牙故道古羊下游卽已斷流獻縣至文安九州縣頓除十餘年之積患卽獻縣以上州縣亦獲暢消之利實爲始念所不及官民同深慶幸已疊次奏蒙

聖鑒在案惟原開獻縣新河本擬分減滹水未克展寬河身今旣奪滹沱全溜勢兼力猛誠慮水大難容復蹈傳轍必將新河加寬

俾得暢洩而資經久又獻縣河開青縣滄海大城文安等六縣原有子牙河兩岸隄工五百餘里爲各縣田廬保障因滹沱北徙年久失修大半塌廢今滹水既歸子牙故道必將通工重加修築庶免旁溢之虞復飭清河道史克寬天津道吳毓蘭候補知府惲桂孫等分投履勘妥籌議據史克寬稟稱獻縣新河應就北面酌量開寬三四五六丈地勢高者挖深丈餘窪者挖深五六尺原出廢土離河五六丈今再於北而移出十丈除挖寬河身三四五六丈外河岸離隄尙有十丈之遠設遇汎漲出槽可使暢流仍以廢土爲隄與南岸之隄對峙其兩隄之遠近較上游古羊下游子牙兩隄相等上下形勢聯絡一律計挑河移隄合土六十六萬餘方至原建李謝留鉢野廠三村橋座應拆修加長以免河寬橋窄阻扼水路其宋家房土壩係堵截滹水不復下趨古羊最關緊要應



加高培厚並於宋家房之南新河頭之北酌添重壩俾資捍衛約  
共需方價料物雜用銀七萬兩又據吳毓蘭等稟稱獻縣以下子  
牙河兩岸隄工東岸自獻縣賈莊橋起歷河閒大城青縣至靜海  
獨流鎮大橋當城止西岸自獻縣新河尾起歷河閒大城至文安  
豐樂橋天津格定隄止共合工長八萬五千三百六十四丈擬就  
原隄基址修築頂寬一丈二尺底寬五丈二尺高八尺青靜文大  
地勢較低之處應築頂寬一丈五尺至一丈八尺底寬五丈五尺  
至六丈三尺高八九尺其隄基偏近河身及無隄而只有河脊之  
處應展寬二三十丈築隄使溜勢舒展共計原隄舊土七十三萬  
餘方應加新土一百七十三萬餘方從前該隄木資民力協修今  
勸諭六縣紳民認修土一百十六萬餘方尙稱踴躍仍體察情形  
令以遠村補近村之不足此縣補彼縣之不足酌盈劑虛通力合

作其不敷之士五十七萬餘方劃歸官辦並修築各段缺口車道  
約需方價及險工椿料雜用銀七萬兩等情具稟前來臣查獻縣  
新河加開寬深則全溜悉歸于牙故道下游九州縣可永除淤水  
之患于牙河堤加築完固則歲時督民修防沿河六縣可永獲保  
衛之益實於地方水利有裨直庫人不敷出平時難議大工今幸  
南省官紳前捐賑款經臣節縮文放尙餘銀二十萬餘兩以之湊  
撥此項隄河及月摺奏辦之大清河下游東淀河工尙可敷用自  
應及時興辦已責成史克寬督辦加開滹沱新河工程吳毓蘭惲  
桂孫等督辦于牙河兩隄工程均於年前籌商布置現已春融卽  
令招集民夫分段認募工作務期妥速告成所需工費飭籌賑局  
照數撥給仍令樽節動支事竣照案彙開清單奏報至此項隄河  
與東淀河道工程均關重要擬俟事竣將實在出力官紳查照河

工章程擇尤酌懇

恩施以昭激勸除咨呈恭親王醇親王查核外理合恭摺具陳此  
工關係新開河道並繪具圖說敬呈

御覽伏乞

皇太后

皇上聖鑒訓示謹

奏

蘇清東淀河道摺

光緒八年正月二十日

奏爲文安縣臺頭以下及天津縣韓家壘以上東淀河道年久淤墊現擬勘籌開挖以暢大清河達津入海之路恭摺仰祈聖鑒事竊直境之大清河爲五大河之一上承西北羣流及西淀巨澗由雄縣會白溝諸水經保定霸州文安而趨東淀自嘉道以後久失修濬尾閘不暢則胸膈壅阻爲害滋深臣疊於新城任邱地面開挖減河分洩盛漲並將隄工逐年修築上年又將文安縣左各莊至臺頭入淀之處挑濬寬深使河水駛流無滯均經奏蒙聖鑒在案伏查東淀向係瀦水之區本甚寬廣乃百數十年來被附近村民侵占墾種遂狹難容多水臣已派奏調差委道金福曾天津道吳毓蘭督同印委確查清理其淀中河道係大清河達津入海之路亦久經淤墊前飭西洋機器船逐漸接挖惟機器船

僅止兩號送泥不遺工段又長自應兼用人力迅速開濬因飭金福會吳毓蘭等節次履勘相度計自臺頭入淀以下至猴山河工長一千九百二十丈應開口寬十一丈至十三丈底寬七丈深八尺至一丈二尺與機器船所開河道上下相接其淀心尙可蕩漾應從緩議又自盧家口東經官亭子白塔寺五鋪鍋鐵店王家房至趙家房東淀下口止工長三千四百九十丈應開口寬十一丈至十三丈底寬七八丈深八尺至一丈卽沿格淀隄邊開濬一面出土幫築隄身統計工長五千四百一十丈合三十里零應挑土三十八萬一千餘方以上各工均在東淀水中須節節築壩厚水卽由水中撈挖施工倍難方價昂貴約需工費銀七萬五千兩經此次疏濬後庶大清河諸道之水滾滾東趨下與永定渾流交滙於韓家壑衝刷當更得力達津入海之尾閘既較暢通上游亦免

乘潰之患實爲必不可緩之要工已飭金福曾吳毓蘭先於年前籌商布置現屆春融卽責成該道等趕緊集夫安實督辦剋期告成所需工費於南省捐助賑餘款內撥給仍令撙節動支事竣照案策開清單奏報除咨呈恭親王醇親王查核外理合恭摺具陳伏乞

皇太后

皇上聖鑒訓示謹

奏

各軍承辦永定南運河工片

光緒八年正月二十日

再上年六月左宗棠來天津會商永定河下游應挑河道擬將所部湘軍與津防淮練各營分段承挑經臣疊飭該河道游智開勘定自南八上汛三號至安家墳止向東斜開新河一道與南首舊河並行免致趨重南隄嗣因安家墳以下尚有淤阻又飭酌估接挑遂議以南八上汛三號起經霍家場盧家鋪張家場至六道口村止計工長三千八百三十五丈其合土二十五萬四千三百九十餘方分歸淮練軍挑挖又接六道口村經西蕭莊曹家場二光村至安家墳止計工長二千三百四十四丈五尺其合土十二萬五千三百六十餘方劃歸湘軍挑挖又接安家墳經魚壩口雙口村入大鞏廠止計工長二千一百九十丈其合土四萬五十餘方亦歸淮練軍挑挖均於三十丈外出土平鋪兩岸酌留缺口以消

盛漲統計原續估工長八千三百六十九丈五尺合土四十一萬九千八百十餘方查湘軍分挑土十二萬五千三百餘方工段較少先由左宗棠派道員王詩正於八月杪督軍興挑該軍因左宗棠奉

命總督兩江亟須相隨南下曉夜趕辦於十月初完工業經左宗棠奏報並經臣委員驗收在案此外淮練軍分認土工二十九萬四千四百餘方較湘軍多至兩倍有餘其時月有開濬塌河淀支河工程又去冬冰凍較早未便草率從事飭俟今春凍解及時興辦茲已檄令記名提督劉盛休率所部銘軍記名總兵黃金志率所部天津練軍拔赴工次分段如式承挑仍飭營務處道員萬國順提督吳殿元與游智開等妥爲照料務於伏汛以前一律完工以資盛漲分洩又前派海防淮練各軍自靜海斬官屯天津興農



鎮新開南運減河六十餘里上年洩水極暢其興農鎮下至大沽  
先由統領盛軍記名提督周盛傳自督所部創開新河九十餘里  
接駛入海沿河農田咸資灌溉實屬有裨地方茲查內有四十五  
里尚嫌淺狹擬於春閒督率盛軍弁勇統行挑挖加寬三丈所出  
廢土卽於十丈外添築兩隄使與減河上游兩隄銜接一片並於  
隄外酌量開溝分洩引灌俾津郡東南斥鹵之地可種稻田計合  
土五十九萬餘方工程甚巨周盛傳復獨力認辦安速經營以竟  
全工而興水利所有分派淮練各軍承挑永定河下游並南運減  
河下游各工緣由除咨呈恭親王醇親王查核外理合附片具陳  
伏乞

聖鑒訓示謹

奏

李朝儀捐建專祠片

光緒八年正月二十日

再原任順天府尹李朝儀服官順直三十七年勤政愛民始終一  
致有古循吏之風臣已將其歷官政績縷晰奏陳蒙

恩宣付史館立傳欽遵在案茲據固安東安永清武清南州涿州  
良鄉宛平等八州縣紳士劉照等稟稱李朝儀前任永定河道憫  
念沿河被災疾苦實力整頓修防請復金門閘南上灰壩及求賢  
灰壩以洩盛漲令河兵常年駐隄酌加口食以資工作民夫積土  
安定章程佈於農隙上隄挑築事竣卽遣歸農既有裨於隄工並  
無妨於民業慎核官帑裁汰陋規多備椿料每遇狂瀾驟至董役  
於深宵風雨之中員弁兵夫無不爭勸是以水患輕減民慶更生  
該紳等目覩勤勞追思遺愛請准於固安縣地方捐建專祠以伸  
報饗等情由固安縣知縣楊謙柄及永定河廳汛各官轉詳前來

臣查該紳民所請出於至誠合無仰懇

天恩俯准在於固安縣地方捐建李朝儀專祠以順輿情伏乞

聖鑒訓示謹附片具

奏

東海關緩解京餉片 光緒八年正月二十日

再據東海關道方汝翼稟稱光緒七年六成洋稅項下奉部指撥京例銀五萬兩抵閩京餉銀二萬兩又額解津防練軍月餉銀六萬五千兩本應依限解足惟稅款之旺衰視乎商船之多寡上年俄議雖成而商船進口無多兼之洋藥銷路擁滯以致收數短絀且六成稅內自添提一成半出使經費留關備撥之銀益少度支更形竭蹶今查光緒六年十二月初二日起至七年十一月十一日止係八十二結至八十五結期滿僅收六成洋稅招商局船稅暨半稅銀十四萬三千九百餘兩除撥還上屆墊解京餉銀一萬三十餘兩撥解七年京餉銀二萬五千兩抵閩京餉銀五千兩天津海防練軍月餉銀五萬兩稅務司薪水並本關各項經費銀六萬一千七百餘兩總共解支銀十五萬一千七百餘兩以收抵支

計不敷銀七千八百餘兩尙由船鈔項下暫挪應急是以除欠解  
津餉外仍欠七年分一半京餉及抵閩京餉實屬無款可籌洋稅  
向係儘徵儘解毫無弊端如本款徵數無多報解未能足額歷蒙  
特准展緩免議有案稟請奏咨前來臣覆加查核委係收不敷解  
並非無故延欠且已墊過銀七千餘兩刻下尙未歸補相應仰懇  
天恩俯准將該關下短七年分一半京餉及抵閩京餉銀四萬兩  
援案暫行展緩免其議處俟稅收稍旺卽行補解以資周轉而示  
區別理合會同山東撫臣任道鎔附片具陳伏乞

聖鑒訓示謹  
奏

遵撥塔城礮彈摺

光緒八年正月二十五日

奏為遵撥塔城礮位子彈等項恭摺仰祈

聖鑒事竊臣欽奉光緒七年十二月十二日

寄諭錫綸奏請飭撥防軍應需鉛藥礮位一摺塔城防軍需用利器目前天津機器局礮彈等物能否勻撥若干每年約可撥濟藥鉛等項若干著李鴻章酌量撥給所請派人教演之處並著揀派前往知照錫綸查照辦理其製造經費及運解川資准由該督核實報銷等因欽此遵查天津機器局製造經費向來僅指海關四成洋稅人不敷出所造藥帽子彈等項專供直東淮練各軍操防之需近年因海防增設輪船水師征調日繁而盛京吉林黑龍江熱河察哈爾庫倫各處又疊次奏咨指撥前經臣奏准由部庫東北邊防經費項下每月撥給銀一萬兩以資添造分撥在案茲塔

爾巴哈臺請撥十二磅開花礮五尊並歲撥開花礮子五百出洋  
火藥五萬斤來福鎗鉛子五十萬出大小銅帽各三百萬粒爲數  
頗巨本屬力難兼顧惟該城爲新疆極邊重鎮切近俄界錫綸整  
頓操防實關重要不得不設法勻濟其維大局今擬撥給英式十  
二磅開花長銅礮五尊四輪車架及器具零件各五副十二磅開  
花礮子五百顆十二抄紙引五百五十箇英式銅拉火一千枝火  
藥向以磅計前門鎗銅帽不用小者應撥給洋火藥五萬磅來福  
鎗鉛子五十萬出大銅帽六百萬粒其子藥銅帽拉火等項仍可  
按年酌量籌撥以濟要需而備緩急所需價銀卽在部庫月撥款  
內彙單報銷儼此後部款欠缺不特塔城軍火未能協濟卽東三  
省熱河察哈爾庫倫各處亦無從籌應矣所有現撥塔城炸礮子

藥等項應請

救下該大臣迅速派員來津請領經過直境州縣由臣飭給車輛  
運送其張家口以外應由臣與錫綸分咨兵部察哈爾都統轉行  
臺站應付車駝以利過行解員所需川資及運費並由錫綸自行  
籌款核給以免輻輳至施放礮位弁兵臣已飭礮隊營員揀派屆  
時隨同前往以資教演所需川資薪水另行核定分別知照理合  
恭摺由驛覆陳伏乞

皇太后

皇上聖鑒訓示施行謹

奏



查獲盛慶兩軍摺

光緒八年正月二十五日

奏爲遵

旨確切查明據實覆陳仰祈

聖鑒事竊臣欽奉光緒七年十二月二十四日

寄諭有人奏准軍統將周盛傳周盛波帶所部盛字營剋扣乾沒米鹽等物悉由該統領轉販分派各營領受勇丁合怒蓄怨羣思得而甘心又吳長慶唐定奎等軍刻待勇丁分駐江南一帶鼓噪時間上年吳長慶所部調駐山東行至清江一聞而散等語究竟有無其事著李鴻章按照所參各節確切查明據實具奏不准迴護掩飾原片著鈔給閱看等因欽此臣伏查淮軍盛字營係同治元年臣於蘇撫任內在海上募練成營諭知周盛波周盛傳兄弟於咸豐年間在合肥西鄉團練鄉勇屢擊敗大股髮捻素稱敢戰

因檄令該員等統帶協勦蘇浙各郡縣粵逆嗣復調勦東豫鄂皖直五省擒匪以次蕩平實盛軍之力居多同治七年賊平後周盛波乞歸養母該軍遂交周盛傳統領周盛波久不在營而言者猶撫及之則其餘之毫無影響概可知已周盛傳所部自同治九年由陝西隨臣移直布置海防歷年築新城造礮臺操練各種後膛鎗礮精益求精盛軍利器足與西洋相埒遂爲各省防軍之冠又以其暇督勇挑挖南運減河至海口百數十里添開溝渠百數十道屯田數萬頃使津東斥鹵不毛之地可治稻田於地方民生水利大有裨益尙不僅防務得力已也儻該營有剋扣乾沒之事勇丁有含怒蓄怨之情豈能踴躍赴功若此至原片稱米鹽蔬菜煙紙等物悉由該統領轉販分派貴逾時價或假小故責革乾沒其餉等語查淮軍定章各營食米向由統領派員赴他處采辦運營

俾臨敵行軍不至乏食盛軍米糧須赴南省購運前經奏明有案  
卽連運腳核計扣銀並無貴逾時價之說鹽蔬煙紙等物均係弁  
勇自購實無由統領轉販分派者勇丁犯規責革必補給應得之  
餉從未有以營官乾沒控訴者至原片稱周盛傳謁見時形跋扈  
臣爲優容羈縻等語查周盛傳老於軍事性情慤直講求洋人練  
兵製器格物之法每與臣言輒憤時嫉俗侃侃不撓臣亦諒其無  
他隨事勸誡該提督素守禮法絕無違悖教令之時近因其母年  
屆九旬屢次懇解兵柄回籍侍養臣以津防至重良將難得曲意  
慰留若以此爲優容羈縻則是公心而無私意也至原片稱吳長  
慶所部上年調駐山東行至清江一聞而散唐定奎刻待勇丁鼓  
噪時間等語查吳長慶素得兵心前年調往山東勇丁閒有久役  
思歸准假月卹本係軍營常事並無行至清江一聞而散之說唐

定奎馭軍仁厚所部前經沈葆楨由臺灣調駐江陰一帶分守沿江礮臺並無刻待勇丁鼓噪之事如有其事應任江蘇督撫臣豈能徇隱姑容凡爲是言者大都湘楚嫉忌之流造謠傾軋遂至傳聞失實臣受

國厚恩忝膺重任選將練兵是其專責惟有督飭在防各將領嚴明約束固結軍心實事求是力圖自強之策以備干城之用如查有肥私剝下情弊必卽嚴參重懲斷不敢稍有迴護掩飾致誤事機所有遵

旨查明緣由理合據實詳晰覆

奏伏乞

皇太后

皇上聖鑒謹

奏

量減旗租經徵處分摺

光緒八年二月初四日

奏爲滙陳直屬旗租科則過重閭閻無力全完擬請量減州縣經徵處分稍示區別藉輕民累恭摺仰祈

聖鑒事竊近畿回有人官旗地分爲存退莊頭屯莊片案三次四次奴典公產八項坐落通州等八十四州縣責成各該州縣徵租本係恭備

恩賞之需嗣將順天府屬經徵者就近解部其餘各屬經徵者解歸藩司撥充本省用項因非地丁正供額賦是以原定經徵處分較地丁爲輕乾隆四十七年前督臣以民欠纍纍始請加重經徵督催處分至嘉慶六年遂與地丁一律議處其時承平日久物力豐富應可年清年款然民欠之數反致有增無減其故何也蓋八十四州縣旗租地畝與民地處處毘連民地每畝徵銀在四分八

釐以下者十居八九在四分八釐以上者十僅一二且有每畝祇徵銀數釐毫者而旗租地每畝須徵銀一二三錢雖於道光五年奉

旨酌減每畝仍有八分及一錢七分五釐至二錢一分之多較民地糧額增至倍蓰地之所出彼此相同而徵銀則輕重懸遠小民終歲勤動不足應上供之需此歷來無力全完之實情非盡由於催科不力也或謂民地尚有差徭是以糧額輕減殊不知旗租地亦係民人佃種並非一律無差且民地原來弓丈較大有折畝半及數畝作一畝者其糧差仍按一畝之數交納其中實有便宜不若旗租地之偏枯太甚或又謂旗租地因係官產是以租額較重但戶部奏定章程直屬未經議租各項旗地凡議租在二分以上者悉予照准並免前欠花利是續增官產徵銀以二分餘為率戶

部已有定章而原有旗租地現仍徵銀八分至二錢一分實屬多寡兩歧難昭公允溯查從前入官旗地未照四圍鄰地科則酌中議租係按契價十成之一定爲租則或以私租之數定爲租則而售主卽有浮報契價私租漁利之弊遂致租則過重迫加重經徵處分牧令懼干嚴議往往設法官墊然所墊者難免藉他事取償於民流弊滋甚自咸豐初年軍興以後地方彫敝差務紛繁官累日重無從代墊其不恤民隱之員功令所迫嚴刑比追血手狼藉各佃戶中有棄家逃避而地畝荒蕪者有情願每畝出錢若干推與他人承佃認租而無人敢應者愁苦情形目不忍觀臣節次留心體察訪得實情亟思正本清源請減租額惟前以兵部馬館鑿儀衛廣恩庫等雜租科則較重奏請減徵部議均未准行則旗租請減竊恐更有窒礙今與藩司崧駿再四籌商只有分別量減經



徵處分之一法除撫甯昌黎獻縣鹽山正定獲鹿平鄉曲周廣平  
蔚州翼州新河武邑定州等十四州縣或地利尙好或額數無多  
仍照地丁處分外其餘通州三河武清寶坻薊州香河甯河霸州  
保定文安大城固安永清東安大興宛平房山良鄉涿州昌平順  
義懷柔密雲平谷盧龍灤州樂亭遷安臨榆清苑滿城安肅定興  
唐縣博野蠡縣安州新城容城雄縣高陽望都完縣河間肅甯交  
河任邱景州故城天津靜海青縣滄州南皮鉅鹿永年雞澤清河  
宣化延慶萬全赤城懷來懷安保安遵化玉田豐潤易州涿水等  
七十州縣或地土瘠薄或租額過重擬請自光緒八年起凡徵至  
七分以上者免其議處不及七分者仍照例開參如此量予變通  
仍定有限制庶州縣考成稍輕不致徒事敲撲所損於庫款者有  
限所裨於民生者實多亦與原定經徵旗租處分不照地丁之意

符合伏念直隸地瘠民貧經兵燹水旱以後閭閻元氣大傷必  
須加意撫綏冀紓積困我

皇太后

皇上勤求民瘼

加惠畿疆凡可體恤之端無不

恩施曲逮茲旗租科則過重民困實深臣曷敢墮於

上聞合無仰懇

天恩俯准照擬量減州縣經徵處分俾可稍緩追呼以廣

皇仁而輕民累理合恭摺瀝陳伏乞

皇太后

皇上聖鑒訓示施行謹

奏

三廳荒地查辦完竣摺

光緒八年二月初四日

奏爲口外張獨多三廳官荒馬廠地畝現已查辦完竣恭摺仰祈  
聖鑒事竊口外張獨多三廳各旗報墾官荒馬廠前於光緒六年  
二月欽奉

寄諭飭臣派員查明籌辦遵卽

奏派口北道奎斌督同印委認真經理並就惡鑑地畝剔除商人  
蠹

國害民積弊循照戶部改歸官辦奏案酌議章程十一條專摺詳  
陳旋經戶部核准轉行遵照一面預請部照六千張發交奎斌填  
用在案茲據該道奎斌詳稱自光緒六年六月設局分派委員馳  
赴三廳邊外地方會同旗民各官逐細清丈查得張家口廳所屬  
舊地四處一爲宗室奎煥卽公爵奕興坐落蘇魯克廠地先於同

治二年勘丈徵糧繼因涉訟荒棄迨同治十一年查丈其墾地一  
千六百九頃九十四畝三分卽以此數徵糧一爲鑲黃旗蒙古世  
襲三等子爵恩裕坐落臺子溝地五百四十四畝內二百七十一  
頃四十畝自同治十年徵糧又二百七十二頃六十畝自同治十  
二年徵糧一爲鑲黃旗滿洲一等公寶全坐落興和城地一千三  
百五十六頃四十九畝內三百五十一頃三十八畝八分自同治  
十一年徵糧又一千五頃十畝二分自同治十二年徵糧一爲鑲  
黃旗蒙古世襲三等男爵榮奎坐落白廟子灘地九百十二頃五  
十畝內五百六十三頃八畝自同治十二年徵糧又三百四十九  
頃四十二畝自同治十三年徵糧前因各地戶呈墾免交押荒銀  
兩經藩司駁查尙未達部升科今查各地開墾日久地勢變遷內  
有水衝沙壓城壞不堪耕種者亦有先係沙荒現經墾熟者此次

既令補交押荒填給部照自應核實勘辦其不堪耕種者悉爲刪  
減續行墾熟者按數加增統以現丈之數爲斷送丈得蘇營克除  
去荒城實有地一千五百十六頃十畝臺子溝除去荒城實有地  
四百三十五頃六十三畝一分興和城除去荒城實有地一千二  
百六十頃五十一畝並新墾熟地一百八十頃內有草商分收地  
三十頃白廟子灘除去荒城實有地八百三十四頃五十二畝均  
卽按戶填給部照除興和城新墾地一百八十頃查係光緒五年  
開墾照例試種三年以光緒八年升科其餘四處地四千四十六  
頃七十六畝一分統歸光緒七年升科其六年以前徵起糧銀均  
解藩庫內有徵不足額者係因地多荒蕪鄉民不知報荒除糧所  
致應作爲儘徵儘解以免民累飭廳開造細冊詳送藩司核明另  
請奏結至該廳屬近年新開之世襲公高山坐落蘇濟梁地一千

六百七十一頃二十三畝二分世襲侯希蘭坐落雲頭壩地九百  
十四頃十二畝樂亭縣典史榮桂坐落板深岡地三百六十頃八  
十九畝續墾蘇魯克四村地一百四十四頃三十一畝世襲輕車  
都尉佐領吉勒罕保坐落花臺壩地三百二十八頃九十一畝馬  
甲訥勒和坐落新河口地四百四十五頃三十五畝除蘇濟梁地  
四百八頃三十一畝五分雲頭壩地九十五頃新河口地一百三  
十一頃十一畝均係五年開墾應以光緒八年升科其餘地三千  
二百三十頃三十八畝七分多係四年開墾統歸光緒七年升科  
又獨石口廳屬正白旗蒙古一等義烈公惠鑑坐落庫倫諾爾廠  
地先由藩司委員查勘其地六百二十八頃九十畝續經查出地  
二十四頃十六畝原議光緒六年升科乃六年夏秋該處亢旱委  
員查勘款收已在五分以上各地戶又皆措交押荒若再徵收糧

銀民力實有未逮應改自光緒七年升科以示體恤又革商分收地六十六頃二十一畝於七年給佃認領詢係五年甫經開墾照例試種三年以光緒八年升科又多倫廳屬宗室薄份坐落新開地共地一百五十八頃十一畝二分八釐一毫內二十三頃二十三畝係五年開墾應以光緒八年升科其餘一百三十四頃八十八畝二分八釐一毫因爭商涉訟種棄靡定現始一律領照認種應以光緒七年升科此查明三廳舊墾新墾地畝分別升科之情形也總計三廳地八千九百六十八頃九十五畝五分八釐一毫由商人放出收過地價者十之八九所有押荒銀兩遵照奏案已交地價之民戶每畝交銀一錢未交地價之民戶每畝交銀二三錢不等其收民戶押荒銀九萬二千六百九十九兩七錢六分七釐八毫填給部照四千九百五十四張另有填寫錯誤廢照四張

一併截角繳銷至革商應交一半押荒除蘇魯克臺子溝白廟子灘板深圖商人或已物故或逃逸無踪及花臺壩並無商人皆不計外其蘇濟梁興和城雲頭壩庫倫諾爾新開地五處革商並新河口馬甲訥勒和其應交每畝一錢押荒銀四萬五千四百七兩七錢三分八釐四毫已收過銀一萬八千七百八十一錢九分又收興和城革商分收地內糧石變價抵作押荒銀二百二十兩八錢七分又收庫倫諾爾革商分收地內糧石變價抵作押荒銀五百五十一兩三錢四分查分收地畝僅止與和城庫倫諾爾兩處其餘均無分收之地現已給佃認種仍照荒地之例由佃戶每畝交押荒銀二錢試種三年以光緒八年升科是官辦仍與開荒無異不必收其餘利該革商等均欠押荒應將分收花利抵作押荒以昭公允統計收納民戶並革商押荒銀十一萬二千二



百五十五兩一錢六分七釐八毫又庫倫諾爾革商人官房屋改  
作衙署估抵銀一百六十兩尙計革商短交押荒銀二萬五千七  
百二兩三錢三分八釐四毫本應照數追足惟該革商等從前所  
得地價半由侵蝕浪費半係交給地主以作充商之資其侵蝕浪  
費者固難盡數追繳其交給地主者尤未便勒令地主賠完疊將  
革商監禁嚴追實已赤貧如洗勢難追足應請從寬豁免仍將該  
革商等遞回原籍保束不許逗遛滋事此民戶革商應交押荒分  
別完免之情形也原議各地升科後每畝應徵給地主私租銀四  
釐除獨石口廳之惠鑑廠地多倫廳之宗室溥份新開地因土脈  
尙好均已照徵外其張家口廳所屬各地歷據地戶聲稱地土瘠  
薄收穫無多每畝徵正銀一分四釐已甚踴蹶實難再交私租因  
查徵給私租之例係指各王公將廠地呈報歸公未得地價者而

言今查各地於呈報後均由地主自行招商開墾地主得銀始行  
派商商人得價始行放地農戶所出地價已歸地主商人分受名  
雖報效歸公實與民間地無異在地主本無喫虧而地戶現又  
重出押荒已覺苦累所領地畝既皆瘠薄應請將地主私租免其  
交納以示區別其佐領吉勒罕保花臺墾地畝並無商人係吉勒  
罕保自行得價放地若按商佃各半分交之例吉勒罕保應交押  
荒銀三千二百八十九兩一錢第地主自收地價核與商人侵人  
肥己者不同且私租既已免徵吉勒罕保應交押荒亦請寬免此  
地主私租應分別徵免之情形也以上各段地畝界內尙有零星  
未墾荒地多係沙城應飭各該廳隨時招佃實力勸墾分別收納  
押荒照例升科所剩部照一千四十二張暫存道庫以備隨後填  
用至地局自開辦以來事務紛煩委員書役分往邊外勘查需費

不貲仍將用款力求搏節截至七年十二月底撤局共用薪工盤費飯食房租等銀一萬一千一百五十四兩四錢核與各省釐局報銷准支十分之一章程相符以後地事即賣成各廳員辦理造具徵收押荒銀兩填給部照清冊同截存照根暨革商未完押荒銀數清摺具詳前來查該三廳所屬各旗報墾官荒廠地向係招商承辦枝節橫生不特

國課虛懸且商人充革靡常民戶受累無盡今部議不准地主與開革去商人悉歸官辦經臣飭據口北道奎斌督同印委妥定章程認真清理現已一律辦竣計得地八千九百六十餘頃分別年限給照升科統收押荒銀十一萬二千餘兩此後每年可收糧銀一萬二千餘兩積弊盡除閭閻無擾辦理甚爲妥速洵於額賦民生有裨據詳免追革商未完押荒及瘠地免徵私租各節均屬因

時制宜自應照辦至所收押荒銀兩除開支地局經費銀一萬一千一百餘兩又循照奏案留充直察邊防軍餉已撥給直隸練餉局銀四萬二千兩察哈爾都統衙門銀三萬兩應再撥給察哈爾銀五千兩尙存銀二萬四千一百兩七錢六分七釐八毫前經奏明添建多倫協將弁衙署兵房及移設官兵盤費約需銀二萬數千兩應在此款內核實動用如有續徵押荒銀兩仍分撥直察充餉其每年所收升科廠地糧銀並照案撥充天津海防練軍月餉再查此次勘辦之地均係王公已開馬廠經察哈爾都統委員查明界址無礙游牧取有旗員甘結存案此外游牧地方多有蒙民句串私墾私佃擬請

敕下察哈爾都統查明已墾之地若下是否無礙游牧知會直隸照章飭交地方官勘辦分別升科惟蒙古以游牧爲根本誠恐開

關目廣轉礙生計嗣後宜制清界限禁止蒙民私相放墾以符定制除冊捐照根咨送戶部並飭各廳開造升科冊結另咨外所有張獨多三廳官荒馬廠地畝現已查辦完竣緣由理合恭摺具陳伏乞

皇太后

皇上聖鑒訓示謹

奏

請假省母摺

光緒八年三月二十日

奏爲近接家信臣母久病不愈籲

恩賞假馳往省視恭摺陳仰祈

聖鑒事竊臣母李氏迎養在臣兒瀚章湖廣督署先後已閱十年

現已八十有三歲平日氣體尙健自去冬感慮便血之證延醫診

治血止而夜熱未清春初稍愈臣前遣長子經方赴鄂代臣侍奉

湯藥頃接來信痰欬時發飲食難以多進老年氣血久虧思子愈

切病情增劇臣聞之心急如焚寢食俱廢念自同治九年春聞督

師赴陝叩別臣母不見顏色十三年於茲矣報

國日長而報親日短今母病久未痊愈中夜輾轉刻難自安相照

頌懇逾格

天恩賞假一月俾臣卽乘輪船航海溯江而上如期馳往武昌省

視臣母病狀稍盡烏烏私忱感激

隆施曷有既極儻蒙

皇太后

皇上福庇臣母得見游子歸侍可以調理復原臣當迅速回任以

供職守至北洋海防及中外交涉事件並直隸地方政務均關重

要應請

簡派重臣來津署理俾無曠誤所有請假省親緣由謹繕摺由驛具陳伏乞

皇太后

皇上聖鑒訓示臣不勝迫切屏營之至謹

奏

覆陳駕駛兵船回華獎案片

光緒八年三月初三日

再臣前因籌辦海防由英國訂購新式快船兼碰船兩號派記名提督丁汝昌督率員弁出洋駕駛回華上年十月臣親赴海外驗收專摺奏報並將尤爲出力人員請獎奉

旨允准在案嗣准吏部咨該員等自出洋至回華核計未及三年未便援照出使各國異常勞績請獎應月核奏辦等因臣查西洋弁兵管駕新船來華沿途須費保險重貲此次該員等遠越重洋數萬里之外駕駛戰艦巨礮回華總稅務司赫德初尙稟請向洋行保險臣密飭丁汝昌督同員弁格外慎重勿庸再糜保險巨費西人愈以爲至險至難乃行經地中海紅海印度海南洋風浪險惡異常卒能保護平穩實較出使隨帶人員僅有筆舌之勞而無駕駛保護船礮之責者尤爲難得其艱苦卓絕勞績實未可泯祇



以係中國從前未有之事兵船向來未到之境並無定章可循是以請照出使各國一例給獎未便再扣年限轉致向隅且各員中有久在海防積功記獎者今因出洋接帶船礮併案議敘亦不得不稍示優異俾昭激勸所有候補縣丞馬毓藻監生解茂承文童馬元愷附生江永池仲祐等五員原請官階班次翎枝均係論功行賞毫無濫合無仰懇

天恩俯念該員等出洋駕駛船礮回華異常勞績

敕部仍遵前奉

俞旨給獎註冊至道銜候選員外郎陳遠濟原請加三品銜候選教諭陳錫周原請加五品銜核與限制未符應請將陳遠濟改爲俟得缺後以郎中用陳錫周改爲俟得缺後以知縣用以符定章理合附片具陳伏乞

卽釀事端又踏王鍾霖覆轍而州縣應交鹽課屆限未能完解正  
供必致虛懸是名爲整頓轉多騷擾而無實濟不如循舊爲妥應  
請永遠照辦無庸更議至各屬欠領引目只須責令按年請領照  
額督銷卽與定章符合其巡緝事宜應就該處情形察酌妥辦方  
無窒礙前已催據臨榆昌黎請領光緒五六年引目樂亭請領五  
年引目灤州請領六年引目盧龍請領七年引目是按年照額領  
引已有就緒嗣後認真嚴催如延不領引卽由該司等詳請撤參  
庶考核嚴而督銷可期得力等情會詳請

奏前來臣查部議設卡添巡原爲整頓緝私起見惟永屬係濱海  
產鹽之區買食向從民便非他岸須由別處運往者可比禁令稍  
密則與情不順必致滋生事端是以從前屢議更張皆經中止今  
幸官民相安課無短絀遵化以西亦不受浸灌之害自應如該司

等所議仍以商捐緝費扣抵課款嚴飭各州縣按年照額領引擇要巡緝就地督銷以期保課便民於鹽務地方均有裨益理合恭摺覆陳伏乞

皇太后

皇上聖鑒敕部知照謹

奏

籌辦朝美議約摺

光緒八年三月初六日

奏為遵

旨籌辦朝鮮與美國議約事宜現經商定約稿並擬請

旨派員前往會辦恭摺馳陳仰祈

聖鑒事竊查美國欲與朝鮮結約通好經臣勸令朝鮮派員赴津與美總兵蕭孚爾商議適朝鮮國王派陪臣金允植為領選使帶學生來津就便籌議外交臣於光緒七年十二月初二日奏奉上諭朝鮮久隸藩屬自應隨事維持調護卽以固我邊陲該國如與美國訂約則他國不至肆意要求於大局實有關係仍著李鴻章隨時相機開導妥為籌辦等因欽此仰見

聖謨廣運綏撫屬邦莫名欽服臣於歲杪卽聞美國派定水師總兵薛斐爾卽蕭孚爾為朝鮮議約全權大臣催令今春乘兵船東

駛朝鮮陪臣金允植亦來保定謁見謂續奉該國王密諭求臣代為主持速與美使商議並寄呈該國機務大臣擬具約稿屬爲鑒定當卽密飭津海關道周馥設法婉留薛使俟臣會商臣二月初抵津薛使訂期謁晤先將伊所擬約稿由周馥譯呈其意欲以日本條約爲藍本臣將兩稿比較所差甚遠且於中國屬邦一節均未提及將來各國效尤久之將不知朝鮮爲我屬土而萬國公法凡附庸小國不得自主者又未便與各大邦立約是彼此均有爲難之處臣屬周馥諷示薛使謂約內須提明中國屬邦政治仍得自主字樣臣亦與金允植等議及該陪臣翁服無異詞因與酌量刪增約稿將各項應防之流弊應獲之權利一一包括在內令周馥及道員馬建忠密交薛使閱訂該使於各款頗有增改大致尙無甚出入惟於第一款聲明朝鮮爲中國屬邦堅不允從意甚決

絕適美國署使何天爵在京與總理衙門議添認明屬邦一節經  
總署王大臣將何天爵擬改第一款照錄專函知會前來何天爵  
旋於二月二十五日來謁乃謂薛斐爾堅執原議慮於兩國平行  
體統有礙且他日國會紳員亦必議駁是以該署使在京擬改第  
一款未能增人臣謂既經議定豈可復行翻悔該署使力稱此事  
本國專派薛斐爾主政伊僅可商辦臣以該兩人既未敢擅允令  
先電請本國核示該署使允爲發電請示至今尙無回報二十七  
日三月初一日薛斐爾復偕何天爵來署商訂此外各款有臣處  
續增而該使酌改者有該使續增而臣處酌改者較原本似更周  
密於一切取益防損之道再三斟酌總期於朝鮮商政有裨將來  
不致爲他國肆意要求以冀仰副

朝廷軫念屬藩維持調護之至意此事與薛斐爾何天爵晤商四

五次辨論二十餘日始有成議所訂約稿擬暫空第一款俟美國回信再議去留臣於稿本紙尾鈐一圖章並邀薛斐爾簽字畫押爲據先交朝鮮陪臣李應浚迅齋回國以爲該國月派大員與薛使商辦之依據並傳見金允植諭知現辦情形告以美國若不肯將第一款添入須於定約後另行設法聲明以符初議此臣疊次與薛斐爾等議辦朝鮮立約之實在情形也朝鮮今春續派陪臣魚允中等尙未到津薛斐爾已赴煙臺與該國水師提督會商約於三月二十日開駛東行諄請臣處派員偕往而朝鮮屢次來員亦懇派員同美使前去頃又接朝鮮國王之叔父總理機務李晟應來書內言美使東來惟臣處是仰是依等語臣反覆籌維該兩國約稿既經議有頭緒若不派員同往恐主客之閒形跡隔闕易生疑衅或再有他人從旁唆撥約事無成而日俄強鄰轉得遂其

離間侵陵之詭計亦東方大局之憂關係實非淺鮮查有二品銜候選道馬建忠精明幹練於交涉公法研究素深此次臣與薛斐爾議約該員皆在座詳悉頭末堪以派往會同朝鮮國王所派議約大員相機妥辦應即請

旨特派前往襄助由臣咨明朝鮮國王知照再薛斐爾乘坐該國兵船前赴朝鮮臣處北洋水師兵輪船本擬於春夏之交飭赴東洋等處游歷藉以測量沙綫練習風濤擬即派統領北洋水師記名提督丁汝昌於三月望後與馬建忠會於煙臺酌帶兵船偕同薛斐爾東駛以壯聲勢而杜要挾除將議定約稿暨臣與朝鮮總理機務丞相李最應來往函件及與金允植筆談底稿照鈔清摺

恭呈

御覽外所有臣遵



旨籌辦朝鮮與美國議約事宜並請

旨派員前往會同商辦各緣由理合恭摺由驛五百里密陳伏乞

皇太后

皇上聖鑒訓示遵行謹

奏

創設廣仁堂招

光緒八年二月初六日

奏爲津郡創設廣仁堂收恤婦孺分別教養已著成效恭摺仰祈  
聖鑒事竊天津河間等屬地瘠民貧屢遭災歉孤兒接婦往往無  
以自存情甚可憫必須創設善堂兼籌教養前於光緒四年旱災  
後據南省勸賑紳士前署陝西藩司王承基候選道鄭官應主事  
經元善等集捐洋銀一萬圓經臣商屬前督辦河間賑務今太僕  
寺卿吳大澂候選知府李金鏞先於津郡東門外南斜街暫設廣  
仁堂收養天津河間兩府屬遺棄子女貧苦節婦一面倡勸捐資  
多多益善飭道員盛宣懷等督同紳董妥籌經久之策嗣因經費  
集有成數遂於西門外太平莊卜地建堂其蓋屋二百八十餘間  
將南斜街原收婦孺歸併太平莊於堂中分設六所一曰慈幼所  
收養男孩初收則爲滌垢治病繼則分撥各所授事二曰蒙養所

設義塾五齋擇聰俊者延師課讀三日力田所於堂之左右購置  
地畝種植木棉稻黍菜蔬擇粗笨者雇老農教習四日工藝所擇  
不能耕讀者令習編藤織席刻字印書俟年長業成聽其出堂自  
謀衣食五日敬節所收養青年節婦及無依幼女仍令各勤女工  
不使閒逸幼女無家可歸俟長成爲之擇配六日戒煙所專延良  
醫安置方藥療治鴉片癮病使吸食者有自新之路庶煙禁不致  
徒設各所均派誠實司事專管其敬節所均係婦女終日扃鎖以  
慎關防飯食等項悉由轉桶出入公舉年高有德之節婦在內管  
束俟守節年例相符由在堂紳董出結移縣轉請

旌表現計開辦三年屋宇一律竣工

效昭然而戒煙除癮者已有二千餘人實於風俗人心大有裨助  
嗣後應責成紳董遵照定章實心經理務垂永久溯查道光年間

保定省城創設全節堂其時只收養婦女五十名今津郡廣仁堂定額七百五十名之多各所收養窮民亦眾歲需教養費用甚鉅而存本生息之款無幾誠恐未能持久除督同官紳隨時設法募捐接濟外查上年京城仿照津章新設廣仁堂經順天府尹奏奉諭旨每年賞給米三百石欽遵在案津郡創設廣仁堂實爲北省賑撫善後一大義舉與京城善堂情事相同相應奏明

敕部立案並撥案銀懇

天恩准自本年起每年賞給南米三百石於江蘇海運漕糧項下在津就近撥領以廣

皇仁是否有當理合恭摺具

奏伏乞

皇太后

皇上聖鑒訓示謹

奏

查明買併旗昌花紅摺

光緒八年三月初六日

奏為查明招商局買併旗昌案內實係旗昌公司洋人提得用銀局員並無沾染恭摺仰祈

聖鑒事竊上年招商局員被參各款當由臣與前南洋大臣劉坤一查覆具奏業經總理各國事務衙門會同戶部議結惟買併旗昌花紅即中金一節總理衙門因南北洋所奏異詞請

敕下該大臣等調齊該局一切卷宗帳據再行詳細確查會同奏明辦理等因光緒七年四月十五日奉

旨依議欽此臣查招商局買併旗昌一切情形均據稟詳南北洋大臣衙門有案其價銀二百二十二萬兩究竟是否交付足數必以該局歷次兌銀帳據及旗昌收字為憑當飭經手銀錢帳目之道員徐潤逐一調齊呈閱並以旗昌收到此項銀兩如何分給股

商如何提分中金招商局有無得項該洋行公司必有底帳尤爲案中緊要關鍵旗昌係美國商人歸上海美國總領事德尼管理德尼前充天津領事曾有函牘往來因託詞密爾諱屬德尼卽往旗昌細查帳目取具旗昌行主簽字筆據呈核並未告知局員被參情由旋據徐潤等稟稱該局於光緒二年冬買併旗昌價銀二百二十二萬兩係截至光緒六年八月止分二十四批陸續交清又出息銀十一萬餘兩分四次交清該局兌交銀兩均由上海各錢莊經手旗昌收銀則由匯豐銀行經手該局與各錢莊及旗昌匯豐皆有帳簿可考實係互相鈐制絲毫不能隱瞞鈔錄該局付價由各錢莊經手帳據並檢旗昌歷次收銀洋文字據三十四紙一併稟呈當派通曉洋文之員將旗昌洋文收據與局帳詳細核對實係交清銀二百二十二萬兩鉅孔相符又據美總領事德尼

洋文覆爾並取旗昌公司洋文簽字節略一紙呈閱譯稱該總領事已將旗昌公司帳目查訖該公司股份共銀二百萬兩又漢口等處地基棧房等項爲旗昌公司之私產者共銀二十二萬兩以上兩款該公司全行收到毫無折扣該公司以停止生意故於各股分之二百萬兩內自取三分半以爲用銀卽於三分半內提付外國經紀人白克昔司寶用銀二萬兩總之二百萬兩股分內除付旗昌公司三分半用銀毫無他項開支旗昌公司除付白克昔司寶一分用銀亦毫無他項開支至旗昌公司私產之二十二萬兩全係該公司所得未提用銀等情臣又節次密派委員於上海等處確細察訪僉稱當日旗昌兼辦金和源公司於股分內提取用銀係分給白克昔司寶及該公司津貼實無招商局員分潤花紅卽中金之事當將洋文字據存案照錄帳目及德尼覆函旗昌



公司節略咨請總理衙門查核一面咨商劉坤一去後旋接該大臣來咨以旗昌公司於二百萬兩內提三分半用銀七萬兩除給外國經紀人二萬兩仍實得用銀五萬兩聞該公司亦有華人合股此五萬兩中金是否華人與洋人一律均分其得銀華人係何姓名飭江海關道劉瑞芬再行查覆會奏劉瑞芬復函屬美總領事德尼查得旗昌行股東均係美國人其賣去輪船公司用銀除二萬兩付給白克昔司實外其餘五萬兩皆為旗昌洋行所得並未分與華人一文等語經劉瑞芬鈔兩稟擬在案查此案係與劉坤一經手之事劉坤一於劉瑞芬稟覆後即行交卸現已奉

俞旨給假赴鄂省親亦須交卸既將案情一再確查已無疑義自應由臣據實覆奏以免稽延所有查明招商局買併旗昌案內實

係旗昌公司洋人提得川銀局員並無沾染緣山埋合恭摺具陳  
伏乞

皇太后

皇上聖鑒謹

奏

覆查盛宣懷片

光緒八年三月初六日

再直隸候補道盛宣懷前於招商局員被參案內經總理衙門議令臣嚴加考察據實具奏等因臣查盛宣懷前派會辦招商局訂明不經手銀錢不支領薪水遇有要務則與局員唐廷樞籌商會稟嗣因商局屢次代人受過堅辭會辦已於前年秋准其不預局務臣疊經嚴加考察該員勤明幹練講求吏治熟習洋情在直有年於賑務河工諸要端無不認真籌辦洵屬有用之才未敢稍涉迴護該員現已稟請假歸應俟回直照例補用謹據實附片覆陳

伏乞

聖鑒謹

奏

試辦織布局摺

光緒八年三月初六日

奏爲招商在上海試辦機器織布局以擴利源而敵洋產恭摺仰

祈

聖鑒事竊查光緒四年十月二十四日奉

上諭御史曹秉哲奏請仿用西法開采以利器用一摺據稱近來各省開設機器等局需用煤鐵甚多請由內地仿照西法用機器開采轉運鼓鑄製造既省買價並濬財源等語所稱招徠殷商聽其開辦酌量徵收釐稅是否可行著李鴻章體察情形斟酌妥善奏明辦理原摺著鈔給閱看等因欽此臣查該御史原奏內稱方今之務以海防爲最要泰西各國凡織布疋製軍械造戰艦皆用機器故日臻富強又謂中國若用機器開采轉運鼓鑄製造其價比來自外洋爲賤更可宏拓遠謨等語所論均屬切要臣維古今

國勢必先富而後能強尤必富在民生而國本乃可益固溯自各國通商以來進口洋貨日增月盛核計近年銷數價值已至七千九百餘萬兩之多出口土貨年減一年往往不能相敵推原其故由於各國製造均用機器較中國土貨成於人工者省費倍蓰售價既廉行銷愈廣自非逐漸設法仿造自爲運銷不足以分其利權蓋土貨多銷一分卽洋貨少銷一分庶漏卮可期漸塞查進口洋貨以洋布爲大宗近年各口銷數至二千二三百萬餘兩洋布爲日用所必需其價又較土布爲廉民間爭相購用而中國銀錢耗入外洋者實已不少臣擬遴派紳商在上海購買機器設局仿造布疋冀稍分洋商之利營經飭辦均以經費不充稅釐太重相率觀望久無成議復飭據三品銜候選道鄭官應三品銜江蘇補用道龔壽圖會同編修戴恆安細籌擬據稟估需成本銀四十萬

兩分招商股足數議有合同條規尙屬周妥當經批准先在上海設局試辦派龔壽圖專辦官務鄭官應專辦商務又添派郎中蔡鴻儀主事經元善道員李培松會同籌辦該道等延聘美國織布工師丹科到滬據稱中國棉花抽絲不長恐織不如式必須就花性改製織機已與訂立合同令其攜帶華花赴英美各廠試織酌購機器本年夏秋之交即可回華開辦查泰西通例凡新創一業爲本國未有者例得畀以若干年限該局用機器織布事屬勦舉自應酌定十年以內祇准華商附股搭辦不准另行設局其應完稅釐一節該局甫經倡辦銷路能否暢旺尙難預計自應酌輕成本俾得踴躍試行免被洋商排擠擬俟布疋織成後如在上海本地零星銷售應照中西通例免完稅釐如由上海運內地及分運通商他口轉入內地應照洋布花色均在上海新關完一正稅

概免內地沿途稅釐以示體恤如日後運出外洋行銷應令在新  
關完一出口正稅若十年後銷路果能漸暢洋布果可少來再行  
察酌另議此係中國自主之事自可特定專章無虞洋商藉口除  
未盡事宜再由南北洋大臣隨時督飭辦理外所有上海招商試  
辦機器織布以敵洋產緣由理合恭摺具陳伏乞

皇太后

皇上聖鑒謹

奏

查復津關常稅摺

光緒八年二月初六日

奏爲查明津海關徵收常稅實在情形恭摺仰祈

聖鑒事竊准戶部咨開御史鄧承修奏請飭查關稅侵蝕以裕國

用一摺光緒八年正月十六日奉

上諭著督撫監督等各就徵收實在情形和盤托出遵照部章於

正額盈餘外按年溢解等因欽此當經轉行遵照茲據津海關道

周馥稟稱天津未設新關以前凡內河外海以及陸路商販貨物

皆歸鈔關完納常稅收數頗旺自各國通商火輪夾板往來便捷

客貨多裝洋船皆歸新關完納洋稅其運入內地之洋貨復准華

洋商人一律完納半稅請領子口稅單免徵鈔關常稅及內地釐

金洋船既便於華船洋稅又輕於常稅商人利析毫芒孰肯舍彼

就此近年鈔關應收稅項惟以土貨爲大宗而洋商采買土貨出



口又准請領運照僅完新關半稅且江浙漕船所帶二成貨物例  
准免稅以致去路太多常稅日形減色此今昔情形不同昭昭在  
人耳目也北地貨稅自來遠遜東南況每年洋稅佔去三十餘萬  
兩彼盈此絀事理顯然每遇災歉之年商貨較少常關稅額尙難  
足數前兩屆設法招徠各有額外溢徵銀一千餘兩均經儘數報  
解該道自上年六月抵任督飭委員認真整頓杜奸僧之偷漏嚴  
蠹吏之侵漁以冀額外多徵一分即可多解一分無如貨物只有  
此數本屆關期報滿能否溢徵若干殊難預料至天津爲北洋總  
匯各省冠蓋往來並與各國洋人款接投縞贈紵宴會犒勞酬應  
紛煩無非取資向有之公費此人情所常有亦事體之當然方今  
時局多艱度支未裕該道職司關權敢不激發天良處處覈實如  
有額外贏餘當儘數溢解稍裨庫款等情稟覆前來臣查津海關

局面遠不如粵閩等關之寬裕而貨物多歸新關完納洋稅每年須佔去銀三十餘萬兩常稅因而有限本屬實情然常稅洋稅皆係正課在關雖有常洋之分於

國用實無虧損

朝廷意存寬大但助將來臣當嚴飭該關道懍遵

諭旨實力稽徵務於正額盈餘外按年溢解其濟時艱勿任隱匿滋弊理合恭摺據實覆陳伏乞

皇太后

皇上聖鑒謹

奏

馳報丁憂摺

光緒八年三月初七日

奏爲

微臣

現丁母憂

恭摺馳報仰祈

聖鑒事

竊臣 恭奉

俞旨賞假一月

赴鄂省親

正在部署經手事宜預備交卸忽接臣

兄由輪船轉寄電信

臣母已於三月初二日申時在湖廣督署病

故臣係屬親子例應丁憂開缺溯自別庭闕於今十有三年生

不能躬自奉養歿不能親視含斂罪愆山積負疚何窮泣血推胸

百身莫贖所有直隸總督兼通商大臣員缺應請

旨迅賜簡放目前地方政務及非洋中外交涉事宜遵例委藩司

崧駿津海關道周馥分別代拆代行署督臣張樹聲未到之先臣

雖居苦次遇有洋務重要事件當隨時指示機宜暫資靜鎮但日

久實懼貽誤懇

恩飛張樹聲趕緊乘輪北上計由粵至津不過旬日臣仍懷  
遵  
寄諭俟張樹聲到後交代妥協卽行起程奔喪回籍守制所有微  
臣丁憂開缺緣由謹繕摺由驛馳報伏乞

皇太后

皇上聖鑒訓示謹

奏

謝賜祭摺  
光緒八年三月十一日

奏爲恭謝

天恩仰祈

聖鑒事竊臣接准兵部火票遞到光緒八年三月初九日內閣奉上諭大學士直隸總督李鴻章湖廣總督李瀚章之母秉性淑慎教子義方今以疾終深堪軫惻朝廷優禮大臣推恩賢母靈柩回籍時著沿途地方官妥爲照料到籍後賜祭一壇以昭恩眷欽此跪聆之下感激涕零當即恭設香案率領家屬望闕叩頭並恭錄

諭旨電致臣兒瀚章即於

臣母柩前焚黃宣讀祭告先靈微臣兒

弟自顧何人迺蒙

錫類之

仁備極飾終之典

溫言褒獎重泉而

綸綽銜

恩

明德馨香九壤而栝棧增慟在臣母死且不朽遠逾華袞之榮在臣等有忝所生敢忘義方之訓惟有著捐頂踵圖報涓埃呼天搶地益懷戴

高履

厚之恩柴骨樂心永矢結草銜環之志所有微臣感激下忱理合會同臣兄瀚章合詞恭摺叩謝

天恩伏乞

皇太后

奏  
皇  
上  
聖  
鑒  
謹

懇請終制摺  
光緒八年三月十一日

奏爲恭謝

天恩 懇陳下情 仍願請開缺 終制 恭摺仰祈

聖鑒事 竊臣接准兵部火票 遞到光緒八年三月初九日內閣奉

上諭 大學士直隸總督李鴻章現丁母憂 本應聽其終制 以遂孝

思 惟念李鴻章久任畿疆 籌辦一切事宜 甚爲繁鉅 該督悉心經

畫 諸臻妥協 深資倚任 且駐防直隸各營 皆其舊部 歷年督率訓

練 用成勁旅 近復添練北洋水師 規模創始 未可遽易 生手各國

通商事務 該督經理有年 情形尤爲熟悉 朝廷再四思維 不得不

權宜辦理 李鴻章著以大學士署理直隸總督 俟穿孝百日後 卽

行回任 際此時勢多艱 該督當以國事爲重 勉抑哀思 力圖報稱

卽以慰伊母教忠之志 有厚望焉 欽此 仰見



皇太后

皇上深仁渥澤既俯鑒臣子之隱曲示矜憐復不棄鶩下之材優加器使凡屬旁觀猶爲感泣矧在身受能無奮興惟冀臣下情有不得不瀝陳於

聖主之前者臣承乏

畿疆十有二年過多功寡慙倚

聖慈格外保全不加譴責臣亦勉竭庸愚但有馳驅感激之心從無瞻顧畏難之念自聞臣母病棘神思昏瞶方

賞假而遠道未歸忽聞訃而終天抱恨在臣心有一息難安之疚在

國家爲絲毫無補之人忠孝大閑進退失據我

朝奪情之案屢見彈章咸豐初年曾國藩勦賊江右適遭父憂其

時軍務正急律以金革無避之義宜可墨經從戎然猶抗疏再三  
堅請終制近年李鴻藻丁母憂奏請終喪亦蒙

聖恩俞允直隸現甚平靜並無軍事著督臣張樹聲於地方情形

素所熟悉淮軍將弁皆有布衣昆弟之歡但使江蘇各省額餉照常籌解必能聯絡拊循爲海口屹然重鎮北洋中外交涉事宜頭緒雖多頻年宣布

皇仁諸臻帖服只須隨事謹守約章操縱得宜可無齟齬之慮至於越南垂危琉球未復此則仰勞

願算隱繁

天心尤賴總理衙門與出使諸臣迎機善導亦非臣之幹材緜力所克策其萬全者也臣母死生契闊相見無期臣卽廬墓三年已無解於不孝無涯之隱痛若復以儼然衰經之身強起視事不獨

上累

聖朝孝治之隆下滋名教罪人之議且台輔崇班封疆重任而以痛心疾首負罪不祥之人濫廁其閒雖蒙

聖主信任不疑微臣豈能無愧於心伏懇

皇太后

皇上矜鑒愚誠收回

成命俯准開缺終制俾秋霜春露稍展歲時愴慕之忱卽枕塊寢苦仍在

天地帡幪之內臣年甫六十居廬之時有限報

國之日無窮縷縷哀悃號泣上訴不勝迫切待

命之至所有微臣願懇開缺終制緣由謹繕摺具陳伏乞

皇太后

皇上聖鑒訓示謹  
奏

再懇終制摺

光緒八年三月二十一日

奏爲瀆陳愚悃仍懇開缺終制仰祈

聖鑒事竊臣恭閱邸鈔光緒八年三月十四日內閣奉

上諭李鴻章奏瀝陳下情仍懇開缺終制一摺情詞懇切覽奏良用惻然朝廷以孝治天下本不忍重違所請強人子以所難惟念李鴻章久任畿疆值此時勢艱難一切措置機宜動關全局實非尋常疆事可比雍正乾隆年間大臣如孫嘉淦朱軾嵇曾筠蔣炳于敏中等皆奉

特旨任在任守制近今如曾國藩胡林翼亦皆奪情起用李鴻章惟當仰體朝廷不得已之苦衷勉抑哀思仍遵前旨俟穿孝百日後卽回署任毋得再行固辭欽此仰見

皇太后

皇上宵旰憂勤廩念全局凡此從權之舉皆非得已之爲

聖訓周詳嘉矜備至雖在犬馬猶有戀

主之忱臣獨何心敢申前請惟以臣之愚處臣之地艱難竭蹶未敢仰希先代諸臣於萬一在

聖主固厚以相勸而微臣卒難援以自寬洩查雍正乾隆年間大臣如孫嘉淦朱軾嵇曾筠蔣炳于敏中等綜其治績各有專長近今如曾國藩胡林翼亦皆身在行間故凡奪情起用者非爲

國家必不可少之人卽屬事勢無可如何之會方今賴

聖主威德四彝賓服九塞清塵固尙晏然無事也而臣待罪畿疆略無寸效可比前賢數年以來調停於中外交訂之幾經營於兵餉兩絀之際雖

君父之慈宥過置瑕而不能弭夫譏忌之口雖

廟堂之上計從言聽而不敢望之僚采之間積誠既不足動人省  
愆宜莫如用晦茲以縉經之身例應終喪可已而不已值此時勢  
臣自揣才力實不能何異夫人爲其事而無其功固無解於妨賢  
誤國之譏評更難免於貪位忘親之咎責若至指摘交加既負  
朝廷知人之明尤失臣母教忠之意則臣之獲罪更大再四籌思  
臣之進退實爲狼狽與其含詬貽羞於日後曷若瀝誠控辭於事  
先惟有懇懇

天恩俯加原諒收回

成命准開大學士署直隸總督之缺俾得在籍終制稍安愚拙之  
分曲全母子之情感戴

皇仁曷有旣極再昨接署督臣張樹聲電信准於三月二十三日  
起程由輪船北上計四月初必可到津臣一俟交卸清楚卽航海

入江奔喪回籍合併聲明所有微臣濱陳愚悃懇開缺終制緣  
由謹繕摺具陳伏乞

皇太后

皇上聖鑒訓示施行臣無任冒死泣血懇求祈望之至謹  
奏

李文忠公奏稿卷四十三